

## ԼԱ. ԱՍՏՂԱԲԵՐԴ

Միւս օրը, վաղ-առաւօտեան, ես եւ Ասլանը, մեր հիւրընկալի ծառաներից մէկին մեզ հետ առնելով, ճանապարհ ընկանք դէպի Աստղաբերդ: Արփիարը ինչ-որ գործերի համար մնաց նրա տանը:

Չգիտեմ ինչո՞ւ, ես միշտ ուրախութիւն էի զգում, երբ Ասլանը տանում էր ինձ մի հին ամրոց կամ բերդ ցոյց տալու: Նրանց աներակները միշտ իմ վրայ ազդու տպաւորութիւն էին թողնում: Արդեօք նրա՞ համար, որ նրանց մէջ ես տեսնում էի անցեալ փառքի եւ զօրութեան խորտակած յիշատակները, թե՛ նրա համար, որ նրանց մէջ ետեւում էր ժողովրդի իշխանների կեանքը, սովորութիւնները եւ նրանց յարաբերութիւնները՝ թէ իւրայնոց եւ թէ օտարների հետ:

Այդ բերդի անունն անգամ ինձ համար հրապուրիչ էր. Աստղաբե՛րդ գեղեցիկ անուն է: Ասլանը ասում էր, Աստղկա-բերդ անտան փոփոխութիւնը պէտք է լինի:

Ճանապարհը ոլորում էր հարթ դաշտավայրի միջով: Ես եւ Ասլանը նստած էինք ձիաների վրայ, իսկ մեր առջեւից ոտքով գնում էր մեր առաջ-նորդը:

Ես այժմ միայն առիթ ունեցայ Ասլանի հետ խօսել Արփիարի մասին: Այդ երիտասարդը ինձ խելքից հանել էր: Բայց դեռ չգիտեր՝ ո՞վ էր նա, որտեղի՞ց յայտնուեցաւ, ի՞նչ նպատակով էր եկել Մուշ եւ այլն: Ասլանը ինձ շատ բան չասաց նրա մասին, բայց որքան էլ ասաց, այն էլ բաւական էր իմ հարցասիրութիւնը գոհացնելու համար: Ես տեղեկացայ, որ նա բնիկ տրապիզոնցի էր, սովորել էր Վենետիկի Մխիթարեանների վանքում, ուսումնասիրել էր պատմութիւն, զխաւորապէս հայոց պատմութիւն եւ հայոց լեզու, գիտեր եւ մի քանի հին ու նոր լեզուներ: Բայց ինչ որ անելի զարմացրեց ինձ, նա կրօնով հայ-կաթոլիկ էր, եւ այնպէս դառնացած կերպով խօսում էր հայ-կաթոլիկների մասին.

«Ահա՛ մի երկրորդ Չալլադ, — մտածում էի ես, — նա կրօնով հայ բողոքական, բողոքում էր հայր-բողոքականների հակաազգային հակումների դէմ, իսկ դա կրօնով հայ կաթոլիկ, բողոքում էր հայ կաթոլիկների հակաազգային հակումների դէմ: Բայց Չալլադը քահանայ էր, չլինի՞ թէ դա եւս մի նորընծայ արեղայ լիներ»:

— Ո՛չ, — ասաց Ասլանը, — սկզբում թէեւ ուխտած է եղել կրօնաւորական կարգը մտնել, բայց յետոյ թողել է:

— Նա կը մնա՞յ այստեղ: